



## Dimapur nung Naturally Nagaland outlet lapokogo



**Dimapur, Chiteni/July 09 (TYO):** Alu nung mozü mamshie züsentetba chiyongtsü aser aonsotsü, fine arts, teka mapa, ola-angla amala ajungkettsü asoshi state sorkari Naturally Nagaland indang outlet ka July 09, 2021 nü Agriculture Production Commissioner, Y.Kikheto Sema, IAS ajanga 4th Mile, Dimapur nung semzüktüogö.

Iba outlet lapokba sentong nung jembiba mapang, local entrepreneurs, aluyimer aser SHG temi ajangetba osettsüset tem state telungzük aser tezülen yokdakttsü asoshi ajungkettsü atema State sorkari jangraba ataoka iba outlet ya sayar, ta APC Nagaland ajanga ashi.

State nung outlet mezüngbuba ibai alitsü aser iba sülen Kohima nung lapoktsü, ta pai metetdakttsü.

Naturally Nagaland brand kübok state nung adokba oset ajak külemi ayoktsü, anungji

Naga nunger sobaliba, chiyongtsü aser takum yimya alima matsüngdang nungtugu kumdakttsü, ta Sema-i ashi.

Entrepreneurs aikati parnokki yanglutetba osettem jenzang tajungba nung yoknür, ajisüaka senotsü tetsükdakttsü aser shishilempaba sapang junga mongutetba ajanga parnokki bilemba ama meinyakteter, anungji state sorkari state nung adokba osettsüset atema ayak balaka agütsütsü sentong yanglu, ta pai ashi.

Naturally Nagaland yagi nungdakba teyari agüja entrepreneurs atema market chain yanglutsütsü aser kasa mapang district aser kin balala ajanga yangluba chiyongtsü aser mozü tem jangjatetsü, ta ashi.

Naturally Nagaland ya taoba küm puratet aser taoba Chief Secretary, Asür Temjen Toy ajanga tenzüka liasü, aser iba yongji Delhi aser Kolkata nung aliba State Emporium tem ya

Naturally Nagaland Emporium ta 2020 küm February ita melenshütsü, ta Kikheto-i ashi.

Naturally Nagaland brand ajungketba mapang, pei meyong brand yangluteter aliba entrepreneurs tem derecognize masütsü aser market nung Naturally Nagaland ajanga yanglutsüba 'window' ajanga parnok indang brand ayoktsü, anungji ibai brand ajak atema 'umbrella organization' ka akumtsü. Mezüngbo Naturally Nagaland indang outlet ya Kohima aser Dimapur kisüng nung lapoktsü aser state alema oa danga outlet tem den sendakteptsü.

Aluyimer tem yaritsü atema sorkari 'window' ka yanglu aser yangji aliba stall tem ya Nagaland nung aliba nüburtem atema lir, anungji ajaki iba maangka ya agitsüla, ta Additional Director DUDA, Anungla-i ayongzüka liasü.

Lai ashiba agi, Richard Belho-i anepalua stall tem lapoktsü aser state outlet aser ano Delhi aser Kolkata nung aliba Nagaland Emporium tem nung product tem sayua ayuba atema entrepreneurs dang shelf shia nungi ita ka nung sen 1000 meshitsü.

Iba sentong nung Commissioner & Secy. Horticulture, Anungla Sato; Director Horticulture; aser department balala nungi HODs tem iba sentong nung dena liasü.

## Advisor Imnatiba-i constituency nung teyari agütsü



**Dimapur, Chiteni/July 09 (TYO):** Alima ajunga COVID-19 tashidak wara tamajung agi sünger nüburtem timtem balala ajurua aliba mapang Advisor, Industries & Commerce, Labour & Employment, Skill Development & Entrepreneurship, Imnatiba ajanga Changtongya Town nung

aliba Community Health Center semdanga yangji Senior Medical Officer aser staff tem den shisa lemsatapa liasü aser iba mozüki nung amshitsü atema oxygen concentrator pongu den 10kv generator ka agüja liasü.

Ajidang masü pai 22 Arkakong Assembly Constituency kübok aliba

yimtsüng toku prong nem oxygen concentrator lema agütsü. Iba sentong nung yimtsüng shia nungi Village Council chairman aser Gaon Bura tem dena liasü.

Maneni koda masüba aser ajungben nungdakba mapang amshitsü atema 22 Arkakong Assembly Constituency kübok NDPP office nunga oxygen concentrator ya ana yutsü aser constituency kübok frontline worker nem achi-ajemtsü agütsüba den külemi amo maneni lungjemer iba COVID-19 tongpang den raratsü ayongzüka atema pelar, ta All Ward Union, Changtongya town nung chairman, Puthyungba Jamir ajanga sangdong ka nung metetdakttsü.

## Noklak district atema NSDMA-i JCB ka agütsü

**Dimapur, Chiteni/July 09 (TYO):** Noklak district atema JCB (3DX Super CEV Stage 4) ka Dimapur nung July 09, 2021 anepdang Advisor, Prison, Printing & Stationary, Govt. Of Nagaland, H. Haiying ajanga sayaja liasü.

Iba sentong nung o tatsüka jembiba mapang, Chief Minister Neiphiu Rio-i state anüdoklen aliba nüburtem atema NSDMA indang department ajanga sentong balaka tenzükttsüba atema

pelar, ta Advisor Haiying-i ashi. Lenmang yanglushiba maparen nung iba yagi teyari tulu agütsütsü, talisa tzungluruwa mapang anentsü aser long nungzüka aluba mapang shia ajurur aser ibaji ajanga lenmang nokdanga gari akhi ama mesenzüteter, ta Haiying-i ashi.

Iba JCB ya lenmang anepaluba kisüng nung masü saka süngdong-lidong atemba, yimdak-yimtsüngtem nung lenmang yangluba, Agri-link

road yangluba nunga amshitsü aser ibaji ajanga nüburtem aisü nung ajangzükttsü, ta pai ashi.

Chief Minister aser CAWD & NSDMA indang Advisor, Kazheto Kinimi nati ozü nüburtem asoshi kanga nungdaka aliba maparen ka peritsüogö, ta paisa ashi.

Iba sentong nung Khiamniungan Baptist Church, Diphupar indang pastor-i Tsüngrem temoatsü jazüka sarasadem. Sentong ya Advisor H. Haiying'er juri kidang agia liasü.

## PELASEMBA OSANG

**Miss Limasenla Jamir, D/o. Mr. Talimoa Jamir (Süngratsü), Jawaharlal Nehru University, New Delhi nungi Ph.D. (History) renemba nung Mongden Yarba Semchir Telongjem Dimapur-i pelaseмба metetdakttsür.**

Tsüngremi la taküm sentongtem maneni moajangma.

**Sd/-  
Gen. Secretary**

## Watsü Mungdang-i aitsür

**Mokokchung, July 9 (TYO):** ajanga metetdakttsü. Iba ama asen atepzüng nung sobaliba dak mapet pi kintsür kati Ao lima tenüng menükttsüba yabo tatok magütsütsüla aser ozüng amertemi aibelener nem temzüngi melaba ama tapet temerenshi agüjang ta akanger aser iba ken-o tatembang kati maru tashi Watsü Mungdangi noktakttsü, ta kasa sangdong nungsa metetdakttsü.

## ICAR-NRC on Mithun aser Hope Channel tsüngta MoU zülutep



**Dimapur, Chiteni/July 09 (TYO):** Scientific yimya Memorandum of Understanding (MoU) ka July 09, 2021 nü tetsürtemi shilem agiba tali zülutepa liasü.

Telok anaprong indang tali aazüka parnok taküm libaliru nükjidong tangatetep nung lungjemer inyakttsü aser külemi sentong balala nung shilem agitsü atema iba MoU ya zülutepa liasü, ta sangdong ka ajanga ashi.

## Fit India Quiz atema registrations thinener

**Dimapur, Chiteni/July 9 (TYO):** June 5 nü osang mapanglemtem ajak anogo agütsüba dak ajemdaker ishika lir metetdakttsütsü. Maneni NBSE-i, Institutions tekolaktem dang Boards official portal nbsen.edu.in semdangtsü atema mepeshia metetdakttsüogö, kechiyong mapanglem melenshiba iba site nunga liasü saka August ita-i sangdongtsü, ta metetdakttsü.



Community Health Center, Changtongya atema Mokokchung District Planning and Development Board ajanga July 09, 2021 nü 15 KV watt generator ka tenla agüja liasü. Iba generator ya Rorheu Peseyie (NCS) SDO (C) Changtongya; Dr. Imtjunshi Aier SMO; Dr. Imtiamong MO aser Dr. Limasashi Ayush MO CHC Changtongya nungertemi agizüka liasü.



Guwahati nung COVID lockdown nung talenba kar salaba sülen kanga dang mazüngi senzüba GS Road nung mahout ka shiti nung mener aoba angur. (Guwahati, July 9)

## AHAM-i Rose aser Samuel Sangma asüba CBI-i bushisüngdang asütsü akhanger

**Shillong, July 9, 2021**  
(Agencies): Meghalaya nung amenoka aliba Achik Holistic Awakening Movement (AHAM)-i Nagaland nung alir Samuel Sangma indang tasümgang nung post mortem tanaben asütsü mepishia metetdaksüogo.

Delhi Police-ibo Samuel ya pa sasa soset ta ashir.

AHAM-i Union Minister for Law and Justice, Kiren Rijiju dangi shidi ka züluba nung Delhi police indang postmortem report ji tiyazü aser Samuel asüba ya CBI nem bushisüngdang südakjang ta takhangba agütsüogo.

Samuel arer tetsü tanutsü Rose Sangma na Gurugram

nung tatalokba balala nung asü saka tena asüba nung taitsü keta lir.

Rose ji mozü kidang anepaluba mapang asü aser Samuel ji soseter lia angu. Iba ya matalokdang Samuel-i Facebook video ka nung tetsü tanutsü Rose ji timi anepaluba masüba ajanga asü ta tai tonglokja liasü.

Samuel indang mang pa talidak Nagaland-i bener aoba sülen repringdang tepo raksar aser tekong nung zübo keter liasü ta osang ajanga ashi.

"Samuel Sangma kanga dang ajungbena asüba nung temolung malemer. Medical doctor mesüra forensic expert

masü yonga tasümgang repringdang asüba kuli ajiteter. Pa temang ajak nung zübotem liasü, tepo raksar aser tebang mechi waker liasü. Pa masüdag video ka nung pa dak züka merenshiba sayuba nung tasümgdangba aika adoker" ta AHAM-i Union Minister Rijiju dang ashi.

"India tongtiba nung alirtemi asenok ya teküpokba jenjang nung alirtem ama züngshir. Anungji iba ken o atema mapa timi meinyak aser bushisüngdang masü lir. Onoki postmortem report nung temolung masür aser CBI nem bushisüngdang südaktsütsü akhanger" ta AHAM-isa metetdaksü.

## Central team-i Arunachal nung COVID-19 tensa repringshimer

**Itanagar, July 9, 2021**  
(Agencies): Arunachal Pradesh nung state sorkari COVID-19 atema sentong renema inyakba repringshimsü aser healthcare workers den sensaksemtsü atema Central team ka aruogo.

Züngsem anati akümba telok nung Patna AIIMS Pulmonary Medicine Associate Professor Dr Somesh Thakur aser Kolkata AIIH & PH Professor Dr Sanjay Sadhukhan na dena lir.

Tenati Chimpu nung Dedicated Covid hospital (DCH) semdangdang "linük

nung tanga tesemtem den medemdangra, NE state tem nung COVID-19 wara tanabuba menur ang atong" ta Dr Thakur-i ashi.

"Menur atongba indang kuli balala alitsü, ajisüaka COVID-19 kanga menatempa aoer aser iba atema shisabulur" ta paisa ashi.

"Arunachal Pradesh nung nütsümg yongsük den medemdangra, nisung aika dak COVID-19 puteter. Iba ya national average dang nungi teimba lir aser centre sorkari shisabulur aser süoki ia bilemer. Iba jagi Centre-i onok state

sorkar yaritsü atema yok" ta Dr Thakur-isa metetdaksü.

"State sorkari mapa junga inyakdar aser tang atemabo tensa aziüoka lir. Ajakji yutsür vaccine agütsüba mapa junga inyakdar. Vaccine agiba ajanga mozü kidang amongba ajema kümogo aser kanga mejungi shirangertem yariba nung teyari angur. State nung Covid wara tasembuba tongra iba ajanga teyari angutsü" ta paisa ashi.

Central team-i TRIHMS, TrueNat lab aser DCH semdangdang, ta State Surveillance Officer Dr Lobsang Jampa-i ashi.

## Tripura nung MLA Brishaketu-i TIPRA nung denogo

**Agartala, July 9, 2021**  
(Agencies): Tripura nung Simna constituency MLA Brishaketu Debbarma-i Pradyot Debbarma-i aniba TIPRA party nung denogo.

Brishaketu Debbarma ya taoba IPFT tanishir ka lir aser pai district level IPFT lennir aika den The Indigenous Progressive Regional Alliance (TIPRA) nung aden.

Brishaketu-i June 29 nü Tripura Legislative Assembly indang Speaker tsümgdang MLA menden nungi anenba shidi agüja liasü.

Brishaketu-i MLA menden nungi anenbaji 'personal reasons' ajanga ta ashi.

Ajisüaka, Tripura Assembly Speaker Rehati Mohan Das-i Indigenous People's Front of Tripura (IPFT) MLA Brishaketu indang shidiji magizük.

Brishaketu-i TIPRA nung

adenba sülen IPFT-i Speaker dang pai züluba shidi agizüksü atema mepishitsü akok.

Tripura nung BJP-IPFT sorkar inyaksangshi nung temolung masür, ta Brishaketu-i ashi.

Külen, Tripura nung aser talisa lisopurtem aliba tesemtem nung BJP-IPFT teloktep pusemertem aikati toktsüogo.

Brishaketu-i IPFT toktsür TIPRA nung adenba sülen ano IPFT nung lisopur lennir aikati TIPRA nung adentsü ama bilemer.

Maneni, Tripura nung BJP sasep nung meputep adoka lir aser BJP tongti lennir aikati Trinamool Congress (TMC) den jembishnüa arudar.

Tripura nung TMC MLA ka danga meliaka, BJP anema tongti opposition ka ama kümogo. Külen, IPFT atema TIPRA ya teblemtsü khuret ka kümogo.

## AR-i Mizoram nung süngdong 7060 atem



**Aizawl, July 9, 2021**  
(Agencies): Assam Rifles indang Serchhip Battalion-i 'Van Mohotsav Week' tenümg nung 'Mega Tree Plantation Drive' ayonga agiogo.

Parnoki Serchhip district den Mizoram kübok tesem balala nung company lemzüka alidak iba mapa inyak.

Van Mahotsav Week ya India nung July 1 nungi 7 tashi among. Iba mapang Assam

Rifles jawan temi Mizoram nung süngdong 7060 atem.

Tang aliba aremtem wazüka ayutsü nükjidong nung Van Mohotsav ya süngdong atemba benjung ka lir.

Iba ya forest conservation indang osang prokshiba den sepaitem aser public den Centre sorkar indang 'Clean Earth, Green Earth' ajungkettsü nükjidong nung amonger.

## Tripura nung ita 7 tsümgda NLFT zümgsem 43 temai adok

**Agartala, July 9, 2021**  
(Agencies): November 2020 nungi May 2021 tsümgda Tripura Police-i National Liberation Front of Tripura (NLFT) zümgsem 43 tashi puogo.

Ita tenet tsümgda NLFT zümgsem 19 temai adok aser lanur 20-i NLFT nung aden, ta Tripura Police-i ashi.

Commander Dilip Debbarma-i aniba NLFT telok kati Tripura nung mapa inyaksü meranger. Parnok ya Bangladesh nung amenoker inyaker.

Tripura Police-i telungpur

43 apuba rongnung parnok 11 tashi January 2021 nung apu.

2019 küm tatemlem ka tashi nung NLFT-i maparen kecha balaka meinyaki dang aru saka 2020 küm tetenzüklen nungi parnoki inyaksangshitsü tenzük.

Iba jagi Tripura Police indang Special Branch-i parnok anema mapa inyaksü tenzüka liasü.

Special Branch-i district police aser Tripura State Rifles (TSR) den yaritepa NLFT indang telok ka shia arutsü merangba anema inyaka arur.

### GOVERNMENT OF NAGALAND DIRECTORATE OF SCHOOL EDUCATION NAGALAND : KOHIMA ADVERTISEMENT

Dated Kohima, the, 7th July 2021

NO.ED/EL/ADV/EXAM/2021::: In Compliance to the Hon'ble High Court order No.W.P.C NO.16(K)/2018,Dated,Kohima the 17th March 2020,applications are invited from eligible candidates belonging to Lotha Community for one (1) post of Primary Teacher at GPS Phiro-B Village under the establishment of the Sr.Sub-Divisional Education Officer,Wokha in the Pay Band-I,Rs.5200-20200/with grade pay of Rs.2000/-with the following conditions.

- Age should not be less than 18 years and not more than 30 years as on 01/05/2021.The upper age limit is relaxable upto 5 years for candidates who are in Govt.Service.
- Applications are to be submitted on plain paper with two passport and standard bio-data along with photo copy of education qualification documents,scheduled tribe,Indegenous inhabitant .
- The minimum requisite educational qualification is 10+2/PU with 45% marks and professional qualification of Pre-Service Teacher Education (PSTE),Diploma in Elementary Education (D.El.Ed) or Bachelor in Education (B.Ed) from any National Council of Teacher Education recognized Institution.
- Application should be addressed to Principal Director, School Education Nagaland,Kohima with Rs.300/- (Three Hundred) only in cash (or DD in favour of Principal Director, Directorate of School Education, Nagaland,Kohima) as Processing fees.Application should be submit at the Elementary Section (Room NO.417).DOSE,Kohima.
- The last date of submission for application is 23/07/2021
- Incomplete applications shall be summarily rejected.
- Date and Time of written Exam will be communicated separately.

(SHANAVAS C) IAS  
PRINCIPAL DIRECTOR



# TIR YIMYIM

## YIMOBILEM (EDITORIAL)

DIMAPUR KÜPTOKNÜ CHITENI (JULY) 10, 2021

### Tebilemstü masüba tebilemstü

Alima nung ya ajaki shitak inyakyonga tebilemstü aika ajurutsü, kechiyong nisungtemi nokdangtsü makokba lendong timtem aika lir. Itemji tashidak wara, aya wara, tzümetsüing, yipru aser menoknok ama lendongtem agi bener arutsüba tetsüba, takoksa, timtem aser shisaboludem asütsü. Item ajakji anü, tzünglu aser mopong dak keta lir. Itemji meimchir ket nung mali saka Tsüngrem ket nung dang lir, anungji Pa mulung. Asenoki tapu aika bilemyonga anü junga mepura aser tzünglu junga marura alu meyimtetsü, anungji yawara arutsü. Ano tzünglu tali arura tzümetsüing arutsü aser tesama takoksa tulu ajurutsü aser alima nung tashidak tapu balala poktettsü. Aji oda, menoknok aser yipru agi takaba ajak anak auyi kümstütsü. Item alima lendong timtemji alima nung anogo shia tesem ka nung mesüra ka nungbo atalokdagi. Atangji, asenokbo tesüngmangtsüka (taochi tulu) item alima lendongtem ka agidanga mekongshir, anungji shitakba agibo tebilemstü kecha mali, alima agi kotak kümer alitsüba limaji asen lima ya asütsüla. Ajisüaka, asenok tia majung asenok ya kanga morumoru, pei agitsü dang metetba nisung, iba jagi tanü putu nung balaka asenoki temoatsü agi tebilemstü kümdaktsür takoksa anguba mapatem aika lir. Item tebilemstü masüba agi tebilemstü (artificial problems) kümdaktsüba mapatemji tenem, ayong aser arem topur tajung ajanga lenmang tajung yanglur temenungratsüka, len talang süaka tadong memetet senzütsüba lenmang agi asenok dak mekokmein aliba agi lenmang junga meyanglu aser apua junga matem ser ki atongdangbo shiranga atonger. Kasaji, temang nung shilumanem ajuruaka jet ta taneptsü agutsü atema mozü ki yanglutsüba sen agi asenoki mozü ki mesüka meyanglutetba ajanga asenok mozü kidang taneptsü mengutet shisaboluba ya shitakba shisabolutsüba mapa masü saka taila shisabolu lir. Kasaji, asenok talangkati mao, rongsen meindok kidang nungi kaketshisatsü tajung angutsüba agi asenoki asen meyang kaketreju anepalu mesüet tanurtem tanga kaketreju nung züngdaktsüba tebilemstü ya shitakba tebilemstü masü saka asenoki asenoksasa asenok kangshitsü yangluba tebilemstü lir. Aji oda, tangarbo tebilemstü agi anisüngzük aser temoatsü küma yanglur saka asenokbo temoatsü aser anisüngzüksüba mapatem agi shisabolutsü mapatemang tapu aika yanglutetter. Ano, asen lima nung temoatsü agi tebilemstü küma yanglutetbaji mobile (internet) service ya asütsü. Asen lima nungbo tanga lima nung amato yipru aitba agi, tzünglu kanga sashia aruba agi, menoknok anokba agi aser tzümetsüing aruba agi mapa meinyaktetter ta asütsüsa kecha mali. Tsüngremibo asenok ya kanga yarir ser nung asenoki asenoksasa meyaritet kangshir. Aji oda, tangang nunga ta, internet ya kaketshirtem asoshi kaketrejui aoba lenmang kümogo aser office aser shishilembaba mapatema ajak internet ajanga dang inyaker, anungji Nagaland nung internet junga maruba agi online class nung metetet akoksar ta kaketshirtem nem ola adokdaktsüba aser longkak aittsü amokmerenba tebilemstütemji shitakba tebilemstütem masü saka temoatsü agi asenoki tebilemstü koma odaktsüba tebilemstütem lir. Internet ajanga dang online class agitsübaji government sentong, anungji mapang tatsükata state tesem kecha nunga internet malia ta masütsüsa anepalutsübaji government mapa lir. Ajisüaka, kari ola madok tashi aser kar longkak mait tashibo mapa kata shitak meinyaktsü ta asüba state ya kechi mesük (?) ta aiben bilemdanger saka shinga memesük, kechiyong tangar statebo asen mesük kata mali. Item ajak madakji Naga yimten tebilemstü yaa tangbo shitakba yimten tebilemstü dang nungibo asenoki tebilemstü masütsüba agi tebilemstü küma yangluba tebilemstütemang tuluba kümogo, kechiyong tangbo Naga yimten tebilemstü ya yimten nüchiso angutsüba tebilemstü masü saka asenok longjemtsüba tebilemstüang tuluba küma lir. Iba jagiang, yashi Naga yimten tebilemstü repringtsü tentetba Parliamentary Core Committee purtem senden nunga, Naga yimten tebilemstü latettsü atema shisatsü tajung ka agütsütsü melen Naga nungger linük tenzükerterem longjemtsü nungdakba ken o tejenang ka nenshia latetshiba asenoki angur. Tangarbo tebilemstü agi temoatsü küma yanglur, aji oda tashidak wara aruba agi mozü yanglutetter, saka asenokbo temoatsü agi tebilemstü küma yanglutetter. Iba amai asenok tebilemstü masüba agi tebilemstü küma yangluba mapang ka nung, shitakba tebilemstü agi atong nungbo koda asütsü (?) ta shisabolua bilema asenok ajaki tebilemstütem yagi temoatsütem küma yanglutsü merangtepedi.

## OLEMSABANG

### KÜ PUNGMANG: AO AROGO YIMDEN YIMSÜSÜBA YANGLUSHITSÜ NÜNGDAK

- Imli P. Lemtur (Jorhat)

(Yashi adok nungj...)

4. Theology Züngnertem Asoshi: Theology azüangi aodang, ABAM ajanga fully recommend süa, ministry placement ajak asoshi agreement yur (ABAM temzüng kübok) theology azüngtsü tenzüker nung koda? Ibai ajanga lanurtem theology azüngtsü asoshi tejangrar aika adoktsü amai pungmanger. Tanü repringdangra, Tsüngrem tenzüker chirtem melen Tsüngrem tenzüker kechiba matoker ta süra, asen Aor tangatetbaji "Tsüngrem tenzükerbo timtema alitsüla" ta pangpet süa jembiba aser aji shidakta benshiba ajanga lir ta sa bilemer. Secular azüng dang endokba sen dang nungibo Theology azüngdang timba endoker, saka Theology zünger külen, "nenok timtema alitsü nangzüker azüngerji" ta asüba sobaliba ya melenshi nungbo, sensaker chira Tsüngrem tenzüker jenti adoktsü amai pungmanger.
5. Arogo nung tenzüker jenjang asangdangba: Temalen shisemba ama professional süa theology azüngtsü asoshi shimba mali, tenzüker shimba mali aser tenzüker ka mapa nung liyonga aodang renloktsü asoshi temelenshi Deacon boardi ashiba dak alaka professional guidance kecha mali. Junga sayutsünga masür nung kechiba ita sen tudaktsütsü, tang agüja alibaji onsara ta jembiba lir. Arogo tenzüker professional guidance anünga lir, shisatsü tasen bendenlokba training agi anünga lir aser aji Mungdangi inyaktetdai ma ta pungmanger.
6. ABAM Boarding School: ABAM ajanga Boarding School tajung achaayangtetra, tenzüker küm pungu sülen melentetpba nung chirnur education asoshi kecha tetsükdaktsü malitsü amai pungmanger.
7. Tenyaba Mapa Inyakyayim: Tangya, local Arogo aika nung Mission Field lir aser pei Arogo sasep Mission Field lapoka, Missionarytem yoker. Iba den külemi ABAMia Mission Field lapoka Missionarytem yoker. Iba yimsüsüba ya lungjemtsü koda? Local Arogotemi yokbaji ABAMi yokba lir. ABAMi yokba nungji local Arogotem ajak dena lir (ter shilem nung 5% agütsüba ajanga). Anungji, Mission Field ajak aser Missionarytem ajak, ABAM ajanga survey sür, ABAM ajanga Commissioned sür yok nung koda?, aser iba dak alak ABAM jurila Mission Field malitsü, kechiaser local Arogotemi inyakyayim ABAMi inyakba lir. Missionji Arogo mulungjang lir saka Ao Arogo karbo Mission Field aser Missionary yoktsüabajibo doktsür, tenzükerterem nema itasen pereia magütsütetba Ao arogotem lir. Iba yimsüsüba ya ataloktetra, ABAM aser local arogotem tesendaktep tali akangshitsü aser local Arogo ajakji Missonary yokba Arogo ka ka asütsü amai pungmanger.

#### Otem

Ao Arogo yimden yimsüsüba yanglushishitsü asoshi kü pungmangtem ataloktsü atema local Arogotemi asen ABAMji Arogo yimden yimsüsüba nung tekolak kümdaktsütet nungbo akoktsü amai pungmanger.

Tanabuba nung, Arogoji pei meyang ama meimbajia kanga tajung. Ozü yimer indang Arogo ta meimbajia tajung. Arogo nung kibur kümer alibajia tajung. Kechiaser iba ajanga Arogo tenzüka nung tali ajungshiteper. Aji süakasa, Arogoji shibai aser shirnoki tenzükakasa, Laishibai sayuba ama, tamasa Arogoji "Khristar Meyong" ta asenoki chichiba nung angatetra; "Khrista nem bendanga agütsütetra" aser "Khristaji Arogo nung Tekolak" ta angatetra, Ao Arogo yimden yimsüsüba yanglushitsüji mela melar asütsü amai pungmanger. Saka "Ni" ta asübjaji sacrifice mesütetra pungmangji amajok.

Khristaji arogo nung tekolak ta ashir. Efesa 1: 22 "Aser pai Khrista tetsüng kübok ajak ayu, aser arogo asoshi ajak madak pa (Khrista) tekolak kümdaktsü." Kolosi 1:18, "Aser temang, oda arogo madak tekolakji pa (Khrista). Kechisarena nung pa (Khrista) tematiba asütsü asoshi, paji (Khristaji) tetenzük aser tasür rongnungi mezüng chir." Meimchirtemi, arogoji Khrista nem bendanga agütsütetra, sen tashi nung meranglokra, nütsüng aser yimti tulu apia masükümra, Ao Arogo yimden yimsüsüba yanglushitsüji tasak masütsü amai pungmanger.

Ao Arogo yimden yimsüsüba yanglushitsü asoshi ibai kü pungmang lir. Ne pungmanga kechi? Tsüngremi moajangma.

### Ao O Spelling (Zülüjang) melenshia aruba otsü tongmelang agi tatsüka

- Rev. S. Temjen Longkümer, Chumukedima

Dr. E. W. Clark mapang nungi tenzüka Ao o nung Khristan kaket tapu balala jenti adoka amshia aruogo. Iba mapang Ao O olasüji (pronunciation) tera balaka liasü südi. Parnoki jembiba olasüyim nung kaket temji zülu. Anungji akhi mapang züluba kaketji tanü putu nung alirtemi zünga moteter (zülujang kenjongji balaka). Aser küm tem süia aodang Ao O jembiba olasü tera melenshia aküm aji oda zülua tera melenshia kümadok ta angateter.

Saka Spelling/zülüjang melenshitsü indang kanga arokaia bilema jembiba aser tejangja melenshitsü tenzükbaji 1950s nungi liasü. Iba mapang Ao Temeshi Lai/Tejen Lai English nungi meyipzüksü tenzüker aji 1950-60 tsüngda liasü. Ano 1954 Nov. nungi mezüngbuba Ao O nung osang kaket 'Khristan Taküm' adok. Aji Aor College Student rogo kudong ser adok. Rev. I. Ben Wati mezüng yimo zülur liasü. Iba mapang Ao o spelling melenshibaji aika liasü. Saka item aika rongnung tatishitsüsa ka dang shidi. Ao O nung 'ü' ya onsara lir, anungji 'ü' ya karbo 'E' agi melensitsü nungdak ta parnoki lemtet. Aji tanü asenoki jembiba olasüyim nungi apiteta lemtetba südi ta angateter. Yamaji asen lenir Lt. Nokdenlemba aser Lt. Rev. I. Ben Wati, parnoki Temeshi Lai/ Tejen Lai meyipzükdang zülüjang Ü ya aika E agi melen. Tatishitsü agi, tanüla melen tanela, kaküt melen kaket. Aser aji asenoki Temeshi Lai nung angur. Ano 1980s tejenba Ao Kaketkeno Komiti, koba dang AKOR ta aja, parnokia aji shitak ta agizük aser tanü ASLB-ia aji agizüka lir.

Saka tanü tashi nung nisung aikati oda educated rogo dena, Tanüla aser Tanela, iba ojang ana ya bendanga mamshiteter. Ocet zülur aikati spirit/tanüla ta zülur aji tai. Ojang ana ya tetezü kenjongji balala. Angatetsü asoshi idaki oren ana sayur. (1) Pai lemang tanüla (slippery) nung jajaba agi ajudoker lao (2) Pa Tanela Temeshi agi asüngba Sannüker.

Tanabuba nung, Osangkaket nung ocet zülur aikati spelling tai amshir. Aser aji nisung aikati azünger aser aikati taiji angazüker. Aser shirnoki spelling tai nung zülur teti yamaji aotsü kechiaaser pai/lai aji shitak ta bilema zülur. Anungji ocet koba nungsa spelling tai ngudir/lidir Yimo züluri (Editor-i) aji melenshitsür adoktsü nungbo kanga ajungtsü ta bilemer. Kechiaser spelling tai metongshitsüba jagibo Ocet nungji mekongshir mesüra tetezüjia memelenshitsür.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Prison Fellowship-i jail nung alirtem nem devotional 100,000 lemtesür



Coronavirus wara mapang US nung aliba jail ka nung puoka alirtemi Prison Fellowship-i lemtesüba Life Recovery Bible azüngdang tangokba noksa nung angur.

**July 09, 2021:** US nung prison ministry tulutiba- Prison Fellowship-i Moody Bible Institute of Chicago den senteper tepuokdak alirtem nem devotionals 100,000 lema agütsüsü.

Osangbener den jembidang Prison Fellowship Field Programs nungi Dan Kingery-i, "Onoki iba maparen atema Moody Bible Institute den partnership yangluogo. Item devotionals ajanga nisung aika taküm melenshitsü onoki yongyaa atar," ta ashi.

"Moody's Today in the Word" kakat nung ajemdaker anogo 120 atema yangluba devotionals ana adoka lir; ka teburtem atema aser ka

tetsürtem atema lir. Devotionals anaprongla nungji osangtajung kakattem (Mathi, Mark, Luk aser Yohan) nungi Lai otem lir. Devotionals nungsa Bible studies aser tamalen jail nung aliba mapang nung Tsüngrem jangjaba aser Khristan tajung kaka akümertem indang taküm kulitem lir.

Tetsürtem indang devotional nungjibo taoksaba nungi taneptsü angutsü lesson keta lir.

Kingery-i, "Jail nung aliba mapang nung tetsürtemi timtem kanga ajangshir. Anungji tetsürtem atema devotionals ji balaka yanglu. Item kakat azüngba ajanga jail

nung alir tetsür-tebur ajaki Yisu taküm aliba jangjatsü, ta onoki imlar," ta metetdaksü.

"Today in the Word" kakat zülusang Jamie Janosz-i yarisema item devotionals kakat zülua liasü.

Janosz ya küm 31 tashi Moody Bible Institute nung inyakogo, aser lanuwa mapang nungi pai devotionals kakattem zülutsü nükjidong liasü.

Prison Fellowship-i July 1 nungi tenzüka US nung aliba tepuokdak balala nung devotionals alem tenzükogo. Prison Fellowship aser Moody Bible Institute partnership ya tesüiba küm 45 tsüngda

Prison Fellowship atema partnership tulutiba lir.

## Chhattisgarh nung Hindu nungertemi pastor ana amokmeren

**July 09, 2021:** Chhattisgarh nung Hindu nungertemi Khristanem tekülem sentong tagidak mapang nung timtem agütsü aser pastor ana amokmeren.

July 4, 2021 nü state yimtiba, Raipur nung Pastor Firoz Bagh leniba nung par kidang tekülem sentong agiba mapang nung Hindu nung 30-40 shi adenshia Khristan yimsü anema yimyim ayim, iba sülen police-i pastor puer ao saka Arogo lenirtemi mepishiba nung ajemdaker ghonda ishika tsüngda pa chioka liasü.

July 7, 2021 nü Sarora Gogaon nung Pastor Ramesh Manikpur par kidang lia Hindu nung 30-40 shi adenshia Khristan yimsü anema yimyim ayim, iba sülen police-i pastor puer ao saka Arogo lenirtemi mepishiba nung ajemdaker ghonda ishika tsüngda pa chioka liasü.

Osangbener den jembidang pastor Manikpur-i, "Ni Hindu nungertem Khristan yimsü dangi meyipdaksür, ta parnok kü nem tai tongloksü aser ozü jabaso dak ama. Parnok 100 shi ozü ki adena süia liasü," ta metetdaksü.

Osangbener den jembidang Chhattisgarh State Christian

Welfare Society Tir, Pastor Moses Logan-i, state nung item ama tatalokba aiben ataloka arudar, saka administration tiyongtsüi aitba sülen terabo azüoktetogo, ta ashi.

"Hindu nungeri tarutsü nungbo tekülem sentong magidaksütsü ta ashi. Iba ya tebilemtesü onük ka lir, kechiyong Hindu yimsü alia amanger telok nungi kari onok maneni amokmerener," ta pastor-i metetdaksü.

"Ni Pastor Bagh den jembioigo aser pai ashiba agi, iba tatalokba bushisüngdangba dak sendakba nung pai anogo shia police station semdang. Pai par kibong atema kanga shisa bulur. Bushisüngdangba tekaraba nung tembangtsü imlar," ta Logan-i ashi.

Pastor Logan-i ashiba agi, police-i Pastor Bagh police station-i anir aoba sülena Hindu nungeri maneni police station longbang aser Khristanem anema yimyim ayima liasü.

Pastor Bagh-i ashiba agi, tesüiba küm 20 tashi pa St. Thomas Evangelical Mission nung tenzüka arur; iba ministry ya registered organization ka lir.

"Tesüiba küm 20 tashi ni

para kidang sayutsüngia aruogo, aser küm ana jakdang ni iba para ki ya alizüka liasü. Yangi alir kar sarasadem agitsü atema kü dangi arur, kechiyong tenokdangba kecha mali," ta pastor-i ashi.

"Ozü Arogo züngsemtem kanga tsübur, kechiyong Hindu yimsü alia amangertemi parnok anema inyaksüa akok, ta parnok bilemer," ta pai ashi.

2003 küm nungi Chhattisgarh nung Bharatiya Janata Party (BJP) sorkar aliba mapang Chhattisgarh Freedom of Religion (Amendment) Act, 2006 agizüka liasü, aser iba ozüng kübok tamangba yimsü melenshinertemi anogo 30 jelia district magistrate dang nungi temelaba meshitsüla.

Iba ozüng kübok aibelenertem küm 3 tashi tepuokdak ayutsü aser senchi 20,000 (US dollar 270) tashi achitsü akok.

India nung Chhattisgarh ya Hindu nütsüng timba aliba (shilem 98.3) state ka lir. Nütsüng million 23 aliba state nung nütsüng shilem 1 Muslim nung aser Khristan nütsüngbo shilem 0.7 dang lir.

## ANOGO ABEN TSÜNGREM DEN

### Tsüngrem lenmang nung jajatsü

"Aser kodang nenoki tajichilen mesüra tabelen meyipdir, nenok tenarongi nenok tesülen ola kati shia angashitsü, "Lenmang ibai lir, iba nung jaja-ang" Isaiah 30:21

Yimti tila ka ajangdanga lenmang tesademba küma yaglutsü tenzü. Gari ana senzü asem aliba, gari pezü asem yanglu. Lenmang meyangluzük tashi nisung mesüra gari senzütsü memela. Anungji yimti nüburtem tanga lenmang ka nung senzüa liasü. Lenmang tejen aliba, tesademba aser tasen küma yangluzüker alidang, nisung ka mapa nungi menur kidangi shilang, saka lai koba kola nungi kidangi aotsü aibelen anungji la kanga timtema naitena senzüa, koda masü lai kinungbo dangi phone sür teyari meshi aser lenmang nguteta kidangi shilang.

Asen taküm nung aiben lenmang shimtsü asoshi ratamatar; taküm nung aibelen mesüi jenjang tematiba nung jajatsü jangrar anungji nisung ajaki lenmang tajungtiba shimner, mapa tajungtiba inyakner anungji nisung ajaki lenmang tajungtiba shimner, mapa tajungtiba inyakner, college tajungba nung züngner, Tsüngremi mulungba nisung den kibong kümner. Asen Tsüngrem tenangzükbaji, lenmang ibai lir, iba nung jaja-ang ta tenarong nung ola kati ashitsü. Lai O azüngdang metetsü, Tsüngrem lar ajanga ashitsü, mangdang nung angutsü. Mapang ajak nung Tsüngrem ola anga odi.

#### SARASADEM

Kü Tsüngrem nai sayuba lenmang nung jajatsü Nai ashiba angaa atadi. Amen

## Nigera nung Baptist Church High School nung azünger 153 puer ao

**Washington, D.C, July 09**

(Agencies): July 5, 2021 nü anepdang yakta Nigeria nung Kaduna state kübok Damisha nung prangpong amer telok kati Bethel Baptist High School nung azünger kakatshir 153 puer ao, ta International Christian Concern (ICC)-i metetdaksü.

Baptist Conference Tir, Rev. Ishaya A. Jangado-i sangdong ka ajanga, "Auertemi Damisha Kaduna nung aliba Bethel Baptist High School makogo ta Hombar, July 5 anepdang yakta onok dangi osang ka aru. Iba tensa ya tejashitsüka lir, talisa kakatshirtem tsürabur aser school atema tejashitsü osang ka lir," ta metetdaksü.

July 6, 2021 nü kakatshir 28 bo nguogo saka tanüngba kakatshir 125 tang tashi samar mangur.

Christian Association of Nigeria, Kaduna State Chapter Chairman, Rev. Joseph Hayabi, par jabaso kasa school nungji azünger, aser pa-a jenbuogo, ta metetdaksü.

Rev. Hayab'er jabaso pa dang, prangpong amer telok ka hostel telungi aitba sülen kakatshirtem dang jokdaka menang ta tuyuba sülen injang khadok, ta metetdaksü.

Iba sülen kakatshir ajak hostel nungi ayazükdaksüba mapang nung kakatshir karbo jena ao.

Baptist Conference Tirisa, school amakba osang angazükba sülen pai security ketdangsertem aser stakeholders den tongtepratepa liasü, ta metetdaksü.

Pai tsüraburtem dang, "Asenoki Tsüngrem dak tamang ayur aser ni tsürabur ajak dang Tsüngrem dak dang tamang akatsü mepishir, kechiyong Tsüngremi makoktsü kecha mali. Ajak takoksang Tsüngremi tiyongtsü aita inyaksü sarasadem," ta ashi.

ICC Regional Manager for Africa, Nathan Johnson-i, "Puer

oa alirtem atema sarasademjang. Parnok tekaraba nung pei kidangi meyipa arutsü atema asenoki sarasademtsüdi. Onoki Tir Buhari aser Nigeria sorkar na dang tanurtem chioksü atema inyadaksüner. Tanur ka danga meyirutsü mesüra masütsü atema sorkari tekaraba nung inyaksüla," ta metetdaksü.

"Tarutsü nungbo item ama tatalokba mataloktsü atema Governor El-Rufai-i nüburtem den longjemer inyaksüla," ta paisa shisem.

**OLONG PAITEP # 5870**

1						2				3
								4		
5		6				7				
8										9
								10		
				11		12				
		13								
14						15				
			16							

- |                         |     |                                |     |
|-------------------------|-----|--------------------------------|-----|
| <b>TIPIEN</b>           |     | <b>LANGTSÜNGLEN</b>            |     |
| 1. O jembitsü tashi     | - 8 | 1. Tepok telung nung shilem ka | - 7 |
| 5. Süngjang tapu ka     | - 5 | 2. Tamajung aküm               | - 5 |
| 7. Tekanük nung enokba  | - 5 | 3. Chi den külemi achiba       | - 3 |
| 8. Teka amtep           | - 5 | 4. Meimchir alimai aruba       | - 3 |
| 12. Tzük asendak        | - 5 | 6. Laishiba nung ayong ka      | - 4 |
| 14. Tsünpang tema aliba | - 5 | 9. Tarutsü nükla               | - 7 |
| 15. Ken atenba yimya    | - 5 | 10. Tamendakdak/Nükjidong      | - 4 |
| 16. Asangur             | - 8 | 11. Tenük-telen mejungi aküm   | - 5 |
|                         |     | 13. Terok nungi adokba         | - 3 |
|                         |     | 14. Meimchir telemsa           | - 3 |

**OLONG PAITEP # 5869 TELANGZÜBA**

- |   |  |   |  |
|---|--|---|--|
| <b>TIPIEN :</b>                           |  | <b>LANGTSÜNGLEN :</b>                     |  |
| 1. Taa, 3. Teküm, 6. Aibelen, 7. Aut,     |  | 1. Tai, 2. Asensor, 3. Tanü, 4. Kua,      |  |
| 9. Ajizük, 10. Ojala, 11. Semer,          |  | 5. Mitsüktsü, 6. Azübenshi, 8. Lah,       |  |
| 13. Sen, 15. Kioktsü, 17. Itsük, 18. Kar. |  | 9. Jangkok, 12. Akok, 14. Nashi, 16. Sür. |  |

**Waraklai tebuba Alokba dang question asüngdang**

Warakla : Hai Alok ! Kechiba tamangertemi deobar nu ya bazar nung dang nungzüteper?

Alokba : Pastor, Missionarytemi temeshi amongnu meshiteta mongang ta sayutsüngiba ya tamanger yagi Sunday bazari oang ta angateter sulapa.

Warakla : Deobar nubo bazari maonunga koda?

Alokba : Aya! Koda sur maotsü, deobar nungang aonsotsü ya Organic dang angur ta asüba agi tamangertemi deobar nungang aritepa bazari oteper nung koda.

Warakla : Süra nia Deobar nu Sunday bazar aotsü temulong moluteter anungji medemer nem talitsü bentsü nung aji Tsüngrem tsüngdang tai asütsü masütsü?

Alokba : Aya-a ajibo Pastor, Missionarytem dang asüngdangtsüba danga no!

Warakla : Naga nungertem shiangaia Sunday bazar maonunga koma sular na?

Alokba : Shibai metet Naga nungeri Sunday bazari maonungbo karbi nungeri Sunday masü tanga anogo ka-ang shimtsü akok ati.

Warakla : Naga nunger tamanger atema tatitang tulubaji kechi?

Alokba : Sunday bazarati.

Warakla : Oh Alokba!! nasa tajungba.

*Lilir : Asangla, Dimapur.*

**TANÜBO NAI LANGZÜANG**

Q. G20 nung Asia linük kwika dena lir ?

A. 4                      B. 5                      C. 6                      D. 7

————— (Taruba adok nung onoki langzütsü)

**YASHI ADOK TELANGZÜBA : Gujarat**

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Khu**

(n) Osettsüset aser jangotsü abentsüba indang (load)


\* Kü khu nung kaket aika enokba agi kanga taret liasü.

**Khuret**

(n) Tebilemtsü aser shisabolu (burden)

\* Covid wara yagi asenok ajak nem khuret tuluka bener arutsür.

**NAI-A YA METETTER MA?**



**Hahim picnic spot**

Guwahati kübok Hahim' ta nüngja agütsüba tesem tajung ka lir, saka amang arur sülenbo iba tesem nung temenen agi mesüshia temoktemnür. Iba tesem nung temenen tesashi kati mesüshir ta otsü ajanga angazüker. Hahim tesem nung kazürtemi asükjang merongtsüsa ola balala angashiba aser temoktemnüba osang aika agütsüo.

**SUDOKU # 5910                      TELANGZÜBA # 5909**

								9	1	8	2	4	5	7	6	3	
8				2				5	5	7	6	1	8	3	4	9	2
					6	2	4		2	3	4	6	9	7	1	5	8
	3	8			7	1			1	8	7	9	3	2	5	4	6
2	4				3		9		3	6	9	4	5	8	2	7	1
		7	4			5	2		4	5	2	7	6	1	3	8	9
	7	2	5						6	2	5	3	7	9	8	1	4
6					8			1	8	4	1	5	2	6	9	3	7
									7	9	3	8	1	4	6	2	5

**OJANG LUTEP # 5455**

MJYAKI	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
NNGU	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
COIH	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
TTTEAU	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MBERIJ	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
HASSIO	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
EMSÜNGTRI	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
TBULEEEJNN	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MALENNG	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MTSENEÜRR	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>

**OJANG LUTEP TELANGZÜBA # 5454**

**MAPANG SHITAK AMSHIRI PEI KIBONG KODANGA  
CHIYONGTSÜ AGI ANÜNGA MEYUTSÜR**

**TAN HOPTA ATEMA - KOMA SÜLA ?**

Q. Nagaland nung Naga nungerbo kibong nung tanur ajema asotsü atema masü aika asotsüang ajungshitep nung koma süla ?



Julu 09, 2021 nü New Delhi nung Union Education Minister tasenba, Dharmendra Pradhan-i osangbenertem den jembidang tangokba noksa nung angur.

### India nung nisung nisung 43,393 dak Covid putet aser 911 asü

**New Delhi, July 09 (Agencies):** India nung ano nisung 43,393 dak coronavirus putet aser iba tashidak agi nisung 911 süogo, ta Hokolbarnü Union health ministry-i metetdaksü. Tang tashi nung India nung coronavirus tashidak agi shiranger 4,05,939 süogo. Tanü (July 9) agi tesüiba anogo 31 tashi India nung anogo shia

nisung lakh 1 den tajemba dak coronavirus puteta arudar. Tang linük nung coronavirus agi teshirangdakpur 4,58,727 dang kümogo; tesüiba ghonda 24 tsüingda iba tashidak agi shiranger 44,459 anepogo aser tang tashi nungbo iba tashidak agi shiranger 2,98,88,284 anepogo, ta Helath Ministry-i metetdaksü. Tang tashi nung nisung

36,89,91,222 nem coronavirus vaccine agütsüogo aser iba nungji tesüiba ghonda 24 tsüingda 40,23,173 nem vaccine agütsüba densema lir. Hokolbarnü Indian Council of Medical Research (ICMR)-i, July 8 tashi nung samples ajak senteper 42,70,16,605 tendangogo aser iba nungji Brihostibarnü samples 17,90,708 tendangba densema lir, ta metetdaksü.

### UP sorkari nütsüing arenba nokdangtsü atema maparen tenzüktsü

**New Delhi/Lucknow, Chiteni/July 09 (Agencies):** Uttar Pradesh state sorkari 2021-30 tsüingda state nung nütsüing tali arenba aziüoktsü atema July 11, 2021 nü maparen tenzüktsü; iba anogo ya World Population Day lir. State Chief Minister, Yogi Adityanath-i nütsüing tali arenba aziüoktsü atema nüburtem nem facilities tajung agütsütsü aser nüburtem nem shilem agidaksütsü metetdaksü. Chief Minister-i sangdong ka ajanga, "Nütsüing tali arenba ya talisa sensak tia aser azüing-zülu mashiba agi lir. Iba dak alia kin kari nütsüing tali arenba timtem memetetba agi lir, anungji asenoki iba maparen nung nüburtem nem shilem agidaksütsü, ta metetdaksü. Uttar Pradesh nung fertility

rate shilem 2.7 lir; shidakba agibo shilem 2.1 dang nungi tajemba asütsüla, ta state sorkar otongdar kati metetdaksü. India nung Bihar aser Uttar Pradesh na dak alaka state aika nung fertility rate junga lir. 2011 Census nung India nung nütsüing timba aliba state ji Uttar Pradesh lir, iba sülen tanabuba aser tasembuba jenjang na nung Maharashtra aser Bihar na lir. Osang angazükba agi, Uttar Pradesh nung nütsüing aziüoktsü atema onük pongu nung ajemdaker inyaksü aser item rongnung health densema lir. Family Planning Programme kübok tanur mabentsü atema 'contraceptive' agütsüba nunga rangloksü aser temang nung timtem majurui tanur raksaa indokba maparen tajungba benoktsü.

Additional chief secretary (ACS), health, Amit Mohan Prasad-i ashiba agi, National Family Health Survey (NFHS)-04 report densema report balala nung ajemdaker state population policy renemer. NFHS-05 ya kobi melii sayatsü aser shilem ana (2026 aser 2030 küm) nung rangloker nükjidong yur inyaksü. State nung nütsüing tali arenba aziüoktsü atema sorkar yaria Uttar Pradesh Law Commission chairman, Justice A.N. Mittal-i draft ozüing yangludar aser iba report ji renemba sülen state sorkar nem agütsütsü. 2011 census nung Uttar Pradesh nung nütsüing million 200 dak tema lir aser India nung nütsüing shilem 16.2 bo iba state nung lir.



July 09, 2021 nü Mumbai kübok Thane nung ozüing alema ola tulu adokba silencers motorbikes nungi agizükba sülen police-i road rollers nem menüngsadaksüba noksa nung angur.

### CNG-PNG jenjang atuba atema Rahul Gandhi-i PM Modi aitsü

**New Delhi, July 09 (Agencies):** PNG aser CNG jenjang atuba atema Ato kilonser, Narendra Modi aija Hokolbarnü Congress party lenir, Rahul Gandhi-i, linük nung osettsüset jenjang maneni atur aser 'tajung anogotem' ya linük nüburtem atema khuret lir, ta ashi. Wayanad MP, Rahul-i twitter ajanga, "Osettsüset jenjang maneni atur, 'tajung anogotem' ya linük nüburtem atema khuret, saka Ato kilonseri par medemertem dang ang langzür. PNG #CNGPriceHike," ta

metetdaksü. 2014 küm Lok Sabha election atema nüboyimba mapang nung Narendra Modi-i linük nüburtem dang 'tajung anogotem' arutsü, ta nangzükba dak sendakba nung Rahul-i Ato kilonser aitsüogo. Tang linük yimtiba, Delhi nung CNG aser PNG jenjang tang timba kümogo; CNG jenjang seret nung sen 43.40 aliba nungi sen 44.30 kümogo. Noida & Greater Noida aser Ghaziabad nunga July 8 nungi tenzükba CNG jenjang seret nung sen 49.08 aliba nungi sen 49.98 kümogo.

### Kerala nung Zika virus putet; Centre nungi mongin telok ka yokogo

**New Delhi, July 09 (Agencies):** Kerala nung Zika viurs putetba sülen iba tensa asadangtsü aser state sorkar den yariteptsü atema Centre nungi züingsem troki akümba mongin team ka yokogo, ta Hokolbarnü Union health ministry-i metetdaksü.

ka state dangi yokogo," ta metetdaksü. Brihostibarnü mezüing arrshi küm 24 mashisa tetsür ka dak Zika virus putet. Iba tashidak ya merla ajanga menateper. Iba sülen Hokolbarnü nisung 13 dak Zika virus putetba National Institute of Virology (NIV)-i jangjaogo, ta state sorkari metetdaksü.

Kerala nung tang tashi nung nisung 14 dak Zika virus putetogo. New Delhi nung osangbenertem senden ka nung jembidang Health Ministry nung joint secretary, Lav Agarwal-i, "Kerala nung nisung kar dak Zika virus putetba osang aruogo. Iba tensa ya asadangtsü aser state sorkar den yariteptsü atema public health mongintem, vector-borne tashidak mongintem aser AIIMS nungi nisung troki akümba team

Zika virus tashidak temaitsütem ya dengue tashidak temaitsütem den mesükteper; temaitsütem rongnung temang metaba, komo adokba aser teret teloktep ashiba densema lir. Kerala Health Minister, Veena George-i, Zika virus prokba nokdangtsü atema asalentong yanglur maparen tenzükogo, ta metetdaksüogo.

### Jyotiraditya Scindia-i Civil aviation minister mapa agizükogo



**New Delhi, July 09 (Agencies):** Yaküm Congress party toktsür BJP nung adensang, Jyotiraditya Scindia-i Hokolbarnü civil aviation ministry mapa agizükogo .

power liasü. 2007 küm pa UPA sorkar nung aniokba sülen 2014 küm tashi Union Cabinet nung liasü. Yaküm March ita nung pai Congress party toktsür BJP nung aden, aser ibaji ajanga yimtenren anokshia Madhya Pradesh nung Kamal Nath-i aniba Congress sorkar chirepa liasü.

Rajya Sabha MP, Scindia ya Madhya Pradesh nungi lir aser Bodhbarnü pai cabinet minister tenangzükba agia liasü. Yaküm March ita nung pai BJP nung aden.

Pa 1971 küm January 1 nü aso aser Harvard den Stanford institutions nung azüing. 2002 küm Scindia-i Guna Lok Sabha constituency by election nung Congress candidate ama toktepa takok ngua liasü. Tebu, Madhavrao Scindia ajungbena tayimtsü tsükokba lendong nung asüba agi iba menden tazüing küma by election agi.

Coronavirus wara ajanga civil aviation sector jenjang kanga mejungi aliba mapang ka nung pai iba ministry agizüker. Taoba mapang Congress-i aniba UPA sorkar mapang nunga Scindia ya Minister of state for communications, commerce & industry and

# Haiti tir Jovenel Moïse ya bendangeri tepset: Police Bangladesh kitsük-kirong lendong nung nisung 52 asü



Haiti Tir Jovenel Moïse tepsetba anema nüburttem Port-au-Prince, Haiti nung aliba Petion Ville nung police station anasa longkak aitdak police nokdaka aliba noksa nung angur. Tir Moïse tepseter aser pa kinungtsü Martine kanga sashia yirutsürtem ajunga bushiteta tapet temerenshi agütsü, ta ketdangsürtemi nangzüka lir.

**Port-au-Prince, Chiteni/July 09 (Agencies):** Colombia sepaï mapa nungi anisüngzüka alir densema bendanger sepaï 28 agi tentetba telok kati hopta tetenzüklen Haiti Tir President Jovenel Moïse ya tepset, ta police temi ashi.

Linük yimtiba, Port-au-Prince nung ki ka nung prangbong agi khatepba sülen nisung kar apu, kong parnok atsükoka liasü.

Azü agi yimpanger aser zübu keter temolung melemi alirtem ya Brehostibarnü osangbener matsüngdang sayu aser prangbong-injang tema kar liasü.

Temolung melemteti alir kar ano bushiba mapang lir, aser par asem police temi khasetogo.

Ajisüaka tang tashi shiba sentong nung iba lendong ya agütsüar ano memetet.

**B o d h b a r n e p** mesangwajungi prangbong

bena alir telok ka linük yimtiba, Port-au-Prince nung Tir Jovenel Moïse'er kidangi aita pa aser pa kinungtsü dak prangbong agi akha. Moïse dak injang 12 indang zübu keter aser tenükjang jokteta adoker süa liasü.

Pa kinungtsü Martine ya kangasa sashia yirua temang anepalutsü atema tayimtsü nung Florida-i bener ao, kong la temang tajungba lir, ta ashir.

Lendong agütsür telok nungya Colombia nunger 15 aser Haitian-American ana dena lir, ta police ajanga ashi.

Ain adoka aliba civilian temi lendong agütsürtem bushia arempok nung atsüka alir ka bushitetba nung police tem den yaritepa liasü.

Taiwan indang diplomatic compound nung temolung melemi nisung 11 apu, ta ashi.

Lendong agütsürtem südi ta temolung melemi bilemba

nisungtem indang gari asem nung nüburttemi mi senloktsü aser kulitem samatsü. Police tekolakbai nüburttem dang süngjema alitsü ayongzüka liasü aser nüburttem dang pei sasa tzüzüng-ozüng mamshitsü ashi.

Ochimashi maparen anema nokdakba mechi arishi küm 53 tain tir dak ya tenük yok südi, ta Haiti nung khen atema Ato Kilonser inyaka alisang Claude Joseph-i ashi.

Brehostibarnü osangbener senden nung police temi Colombia indang passport kar sayua liasü.

"Tir tepsettsü asoshi bendanger asen linüki aru," ta Charles-i ashi, aser temolung melemi aliba nisungtem teka alener pa anasa ali nung mena liasü.

Colombia sorkaria temolung melemi pua alir nisung trok bo mitkar mapa nungi anisüngzüka alirtem amai lir, ta shiogo. Parnoki bushisüngdangba nung Haiti yaritsü shiogo.

Ajisüaka US state department-ibo pua alirtem rongnung par senso dena aliba mejangjateter, ta ashir.

**Dhaka, Chiteni/July 09 (Agencies):** Bangladesh yimtiba, Dhaka tezülen storey trok atongtepa süa aliba juice factory ka nung mi adoka nisung tajemba agi 52 asü aser 50 dak tema yiru, ta Hokulbarnü osangtem ajanga ashi.

Naryanganj kübok Rupganj nung aliba Shezan juice factory nung mi ya Brehostibar nikonngang 5:00 ako meta adok, ta mibener temi ashi.

Mi ya ground floor nung tenzük aser chemical aser plastic aliba ajanga kanga kera janruloa ao südi, ta temolung melemteti lir. Iba lendong nung nisung 52 süogo aser 50 dak tema yirur lir, ta Dhaka Tribune ajanga ashi.

Mi jangrua aliba nungi kumzüksü mechi yangji mapa inyaker aika ki nungi pongzük, ta ashi. Hashem Foods Limited indang factory building nung mi jangrua aliba remseptsü atema firefighter unit 18 arua liasü.

Pei kinunger adianutem bushitsü atema nüburttem iba ki jakdang adenshi. Samar alirtem rongnung yangji mapa inyaker nisung 44 tejangja lir, ta osangkaket ajanga ashi.

Mi adokba mapang iba factory nungi adokba lenmang

aser tejaklen kishi shibanger liasü, ta kumzüka aliba mapa inyaker aser kinungertemi ashi. Mi lendong nungi jembutsü atema mera kecha agia mali, ta parnoki ashir.

Mi jungjunga remseptsü asoshi mapang agitsü, ta Narayanganj District Fire Service nung Deputy Director Abdullah Al Arefin-i ashi. Mi jungjunga meremseptet tashi mi kong nungi adok mesüra koba tashi teraksa agütsü, itemji meshitetsü, ta pai ashi. Iba lendong ketdangsütsü atema district administration ajanga züngsem pongu agi akumba committee ka tentetogo.

Bangladesh nung kitsük-kirong lendong ya mapang shia ajurur. Taoba küm February ita Dhaka nung nisung aliba ki ishika rongrokba lendong nung nisung 70 asü.

Mi adokba mapang ki telung nung nisung aika liasü, ta iba factory nung inyaker Mohammad Saiful-i ashi, shiba lendong nungi jenbua liasü.

"Floor tasembuba nung aliba stairwells anaprong nung kishi shibanger liasü. Ki telung nung nisung 48 liasü ta külem inyaker kari ashir. Parnok dak kechi atalokar ni memetet," ta pai ashi.

## Taliban-i Afghan-Iran arrtsü alema senzüba tesem amokbang

**Kabul, Chiten/July 09 (Agencies):** Afghanistan aser Iran tsüngta arrtsü alema senzüba tongtipang tesem ka Taliban teloki amokbangogo, ta Afghan ketdangsürtemi ashi.

Arrtsü nung aliba customs office kilem nung songa aliba Afghan nunger nisan ka Taliban teloki agizükba video ka nung sayuogo. Iran linüki aoba shishilempaba lenmang tulutiba rongnung Islam Qala crossing ya ka lir, kong sorkari ita shia sarusaji nung sen million \$20 bendenteter.

US-i aniba mission tem anüngzüka aliba sepaitem

anizüker aoba mapang Taliban teloki Afghanistan nung tesem balala tanaben agiyonga aor.

America nungertemi hopta tetenzüklen ola madoki Bagram airfield yutsür ao, koba Afghanistan nung US sepaitemi operation agidang parnok amenoka liasü aser sepaï meyrirjang aika anenzüka liasü.

Afghanistan nung district 400 aliba nungi tangbo Taliban kübok shilem asem dak tema aitogo, ta züngshir aser item rongnung anüolen tsütsü Iran den arrtsü nungi China den arrtsü tashinung alitsü.

*(Maneni tapak 10 nung...)*

## Sri Lanka nung Rajapaksa'er kibong tashi akangshir

**Colombo, Chiteni/July 09 (Agencies):** Sri Lanka Tir Gotabaya Rajapaksa-i tenu tanubosang, Basil Rajapaksa ya finance minister ama shimteta iba asetkong linük nung par kibong tashi ulushir.

Brehostibarnü Basil ya parliament züngsem ama tezüngzüktep agi aser Ato Kilonser Mahinda Rajapaksa nungi finance minister menden ya melenzük. Ato Kilonser Mahinda ya Basil teti alitsü.

Basil ya US-Sri Lankan senso agia lir, aser Treasury aser Central Bank densema pa küboki linük nung tongtipang institution tem aitdaksür.

Mahinda nem economic policies and plan implementation indang minister inyaksü shilem talila agütsü, ta osang ka ajanga ashir.

Ano Gotabaya'er adianu Chamal lir, shiba irrigation minister aser junior minister of defence inyaker.

Mahinda'er jabaso Namal ya minister for youth and sports

alitsü.

Taoba küm parliamentary election agiba mapang Gotabaya aser teti tambusang, Mahinda nati menden timba nguteta iba linük indang constitution nung temelenshi benoktsü atema par kibong nem tashi agütsü.

Mahinda ya Sri Lanka indang tir ka ama 2005 nungi 2015 tashi kümsük ana inyaka aru aser 2020 election nung takok anguba sülen ato kilonser akum.

Tang sorkar tenteta aliba Sri Lanka Podujana Peramuna (People's Party) nungi züngsem kari Basil ya taruba tir election nung tokteptsü akok, ta ashir.

Tourism dak metaloka aliba Sri Lanka nungya coronavirus tashidak wara den raraba mapang lir.

Sri Lanka nung Brehostibarnü tashinung COVID-19 tashidak agi nisung 268,676 menepa lir aser nisung 3,351 süogo, ta health ministry ajanga ashi.



Paris nung Bastille Day parade agitsü atema renemshia sepaitemi Champs Elysees avenue nung jeep ka anir aoba noksa nung angur. Bastille Day ya France nunger national holiday ka lir, aser ibai 1789 küm July 14 nü French Revolution tenzükba bilemteta amunger.



GOVERNMENT OF NAGALAND  
DIRECTORATE OF INDUSTRIES & COMMERCE  
NAGALAND : KOHIMA

**Admission Notice for the Academic Session 2021-22**

Online/Offline applications are invited from eligible candidates for Admission to 'Diploma in Tool & Die Making' Course (4 years specialization course in Tool Design and Manufacturing & equivalent to 3 years Diploma in Mechanical Engineering) approved by AICTE at Nagaland Tool Room & Training Centre (NTTC), Dimapur.

**Eligibility:**

- ❖ Class 10th Passed
  - ❖ Age should be between 16 to 19 years. (90% seats reserved for SC/ST candidates and also relaxation of three years in the upper age limit).
- (Note: Those candidates who have appeared their Class 10th exam and are waiting for the results can also apply.)

Application Form and Prospectus is issued at NTTC office,  
Dimapur on all working days (9:00 AM to 4:00 PM)  
OR

Registration can be done ONLINE at <https://nttcdimapur.org.in/>  
APPLY ON OR BEFORE 23RD JULY, 2021  
Date of Interview : To be notified

**Features:-**

- ❖ Stipend amount of ` 500/- p.m. during the course or ` 600/- p.m. NEC stipend for meritorious students of HSLC exam.
- ❖ Incentives from the Institute for merit students (Semester wise) & students with 90% and above in attendance (Month wise).
- ❖ 70% & above in HSLC result - Direct & free admission.
- ❖ Company allowances between ` 8,000/- to ` 15,000/- p.m. in the 4th year during On-the-Job-Training/Industrial training period outside the State.
- ❖ Earning while learning Scheme shall be extended to willing candidates.
- ❖ Students of Diploma in Tool & Die Making are eligible for SBI Education Loan.
- ❖ 100% placement assistance in Private/Govt. Sectors.
- ❖ Hostel seats available.
- ❖ Registration fee Rs 200/-.

For further details, visit the website: <http://www.nttcdimapur.org.in> or contact the following Course Coordinators: 7005162525 / 8787364436.  
(Reception desk 8257002079)

Sd/-  
Shri. K. Hokishe Assumi  
Director

❖ Website: [www.nttcdimapur.org.in](http://www.nttcdimapur.org.in) ❖ Email-ID [nttcdimapur@gmail.com](mailto:nttcdimapur@gmail.com)  
NTTC, New Industrial Estate, Sub-Jail Junction (Tinali), NH-36 Diphu Road, Dimapur: Nagaland

**TEPELA LEMSATEPER**

ASO :  
07.08.1947

ASÜ :  
04.07.2021



Asür T. Bendang Imchen (Aliba) Retired Registrar, shiba iba akümüli ya toktsür 04.07.2021 nü süogo, onokkibo bilemer asen teyanglur Tsügremiti pa asoshi mapang tetemsü nung bener ogo ta Tsüngrem tenüng asanger. Pa asüba mapang nung

1. Kohima Ao Baptist Arago (KABA)
2. Kohima Aliba Senso Telongjem
3. Kohima Molungyimsen Senso Telongjem
4. Kohima Chungtia Senso Telongjem
5. Lower Agri Council, Kohima
6. Lower Agri Youth, Kohima

Nenok shirnokisa ozü asüko mapang nübo, rongsen aser sarasadem agi yaritepogo, nenok ajak dang asür kinungertemi kangasa pelaba metetaksür. Nenok kija, kibong aser lokti ajak dangi arur onok tepelaba melemsateptetsü saka asen teyanglur Tsüngremi nenok ajak tali moajangma.

*Kinungsü, Jalatem, Semchir,  
Anük-Apang aser Kinungertem*

OFFICE OF THE  
**KHAR VILLAGE COUNCIL**  
P.O. Mangkolemba, Dist. Mokokchung,  
Nagaland

**TENÜNGSANG AGÜTSÜR**

Er. Tiameren Khar yimti nungi Chief Engineer menden Govt. of Nagaland NPWD nung tongtetba asoshi Khar Yimteni pa dang pelar aser tenüngsang agütsür. Pa mapa agi Govt. of Nagaland aser nübortem tali temoatsü südakjangma.

Sd-  
Sashikaba.  
Chairman.  
Khar Village Council.

Sd-  
I. Wati Jamir  
Secretary  
Khar Village Council.

**August 5 nü 'Fast And Furious 9' sayatsü**



**New Delhi, Chiteni/July 09, 2021 (Agencies):** Tasa balala amshia gari arishitepba aser züktepba - "Fast & Furious" franchise indang installment tukububa ya India nung August 5 nü sayatsü terenemba lir. Iba film nung tanga actor rongnung Vin Diesel, John Cena aser Cardi B nungeri tongti shilem agiba angutsü, ta Brehostibarnü sangdong ajanga metetdaksü.

Justin Lin-i direct asüba film nung Michelle Rodriguez, Tyrese Gibson, Jordana Brewster, Chris Bridges (Ludacris), Nathalie Emmanuel, Helen Mirren, Ozuna aser Charlize Theron nungeri shilem agiba angutsü.

Universal Pictures-i iba film sayatsü atema Brehostibarnü osang sangoktsü. India nung iba film ya English, Hindi, Tamil, Telugu aser Kannada oshi

nung lemsar sayatsü. 'Fast And Furious 9' film ya US, Canada, China, Russia, Korea, Hong Kong aser Middle East linük nung sayaogo. Ajisüaka, India nung Covid-19 second wave kanga mejungi akümba ajanga, iba film sayatsü anogo atsülangja liasü.

Nüngtugu franchise indang installment tukububa nung, cast rongnung tejak tasen - John Cena den Cardi B aser Ozuna na bendenlok, ta sangdong nung shia lir.

Lin aser Daniel Casey na longjemmer Universal Pictures indang film zülüja liasü. Film tasenba ya 2017 küm sayaba "The Fate of the Furious" den tatongtep alitsü.

India nung Hollywood indang takok tulu anguba franchise rongnung 'Fast and Furious' alitsü aser 2001 küm franchise indang mezüng film sayar külen nungi alima tesem

ajanga nungi billion dollar 5 tema aazükogo.

Tang, film tasenba ajanga alima tesem balala box office nungi million 500 dak tema aazüka lir.



New Delhi, Chiteni/July 09, 2021: Telugu actor Naga Chaitanya-i Bollywood nung ajemoka Aamir Khan den külemi 'Laal Singh Chaddha' nung shilem agitsü terenemba lir. Hokolbarnü, Naga-i film indang team nung denogo. Tollywood nung Naga Chaitanya sapur jenti lir aser Ladhak kübok iba film set nung tangokba noksa ka pai Instagram ajanga lemsatepa liasü. Iba noksa nung, pai Aamir Khan, iba film producer, Kiran Rao aser director Advait Chandan nunger den külemi noksa ka tangok. Actor anaprongla (Aamir aser Naga) Indian Army uniform semer tangokba noksa ka yangi angur.

